

Tellement qu'il fuffit (au rapport de quelque hiftorien) à ceux qui prefchent la parole de Dieu, d'apprendre une feule langue de celles-là pour aller par un pays long de deux ou trois mille lieuës, au lieu qu'il leur auroit fallu 15. ou 20. langues, voire d'auantage *, pour pouuoir porter l'Euangile de Nofre Seigneur par tout cette eftenduë de Prouinces & Royaumes.

*De la forme, couleur & ftatuë des Sauuages, & de 367
leurs parures, ornemens & matachias.*

CHAPITRE XXII.

Toutes les Nations & peuples Indiens, & Sauuages que nous auons veus en noftre voyage, font prefque tous de couleur brune, oliuatre ou bazanné (excepté les dents qu'ils ont merueilleufement blanches) non qu'ils naiffent tels, mais cela vient de la nudité, de l'ardeur du Soleil qui leur donne à plomb fur le dos, & de diuerfes graiffes, huyles, & peintures, defquelles ils fe frottent & peignent fouuent tout le corps, comme nous voyons en France à ceux qui fe font appeller Egyptiens ou Bohemiens, lesquels changent leur couleur blanche en brune, & oliuafte, par le moyen des huyles defquelles ils fe frottent le corps pour fembler Egyptien, bien qu'ils foient François, & n'ayent reffenty autre chaleur que celle d'icy, ny habité autre climat que celuy de la France.